



Sübokrem agiba ken o nung taoba
Kerala CM bushisündangtsü tuyu

Russia-i Ukraine indang industry
balala amak; nisung 4 tepsetogo



Governor Yadav-i NPSC maparen meyipa reprangshi

Dimapur, September 22, 2026

(TYO): Nagaland Governor Nand Kishore Yadav-i September 22, 2026 nü Lok Bhavan nung Nagaland Public Service Commission (NPSC) ketdangsürtem den senden ka menogo.

Senden nung NPSC ketdangsürtemi Commission indang temetettsütem lemsatepa liasü.

2025-2026 tsüingda Nagaland Civil Services and Allied Services Examination, NCS & NPS & Allied Services Examination, Engineering Services Examination, Medical Services Examination, Technical Services Examination aser Stenographer Examination dena services balala atema tatidangtem agiogo ta NPSC-i ashi.

Tatidang balala nung candidate aika liasü aser NCS & Allied Services Examination nung applications 16,433 aser NCS & NPS & Allied Services Examination nung applications 5,813 aru ta NPSC ketdangsürtemi ashi.

Senden nungsa Departmental Promotion Committee (DPC) ketdangsüba indang benoka lemsatep. April nungi August 2026 tsüingda Commission-i ken o 444 bentetogo aser item ya promotion ken o 163 aser regularization ken o 281 liasü ta ashi.

NPSC-i examination system akangshitsü atema maparen aika inyakogo aser item rongnung NCS, NPS aser allied services tatidangtem indang syllabi aser examination patterns meyipa reprangshiba dena lir ta ketdangsürtemisa ashi.

Parnokisa Combined Technical Services Examination atema revised syllabus aser examination pattern lemsatep.

NPSC-i technology aser digital processes agizüka beshitsü meranger aser iba atema Ministry of Electronics and Information Technology (MeitY) nungi tenüngsang agütsüba kulikaket ka nguogo ta ketdangsürtemi ashi.

Tatidang balala nung candidate onsara aliba ajanga examination centres tajung peria mangur aser iba den nübo talila aser examination facilities tuluba nüngdaker. Nüngdaktem peritsü atema staff aser examination infrastructure tashi itshitsü nüngdaker ta NPSC ketdangsürtemisa ashi.

NPSC-i tarutsü nung Combined Technical Services atema three tier examinations agitsü sentong renemer, online departments ajanga submission of requisitions aser NPSC complex nung examination hall ka yanglutsü tebilemba lir ta ketdangsürtemisa Nagaland Governor Yadav dang ashi.

CTAN-i sorkar recruitment order melenshidaktsünür

Kohima, September 22, 2026

(TYO): Combined Technical Association of Nagaland (CTAN)-i Mongulbarnü state sorkar dang September 15 Office Memorandum nungi onük ka agientsü ayongzükogo.

Iba Memorandum nung Manpower Rationalisation Committee (MRC) aser Cabinet nungi departmental vacancies atema clearance meshitsü shia aliba agientsüla ta parnoki ashi.

"Onoki iba OM anema noktaker masü. Sorkar nükjiong ka alitsü südi. Onoki onük ka magizüker" ta CTAN convener Mesheno Kath aser co-convener Kaqhetto nati ashi.

Kohima Press Club nung osangbener den jembidang iba OM nung Point 2 agientsü takhangba agütsüogo.

Department temi tesüiba nung ama Nagaland Public Service Commission (NPSC) aser Nagaland Staff Selection Board (NSSB) dangi indangindanga vacancies yoktsüla aser MRC o Cabinet clearance nüngdak madoker ta CTAN-i ashi.

Combined Staff Recruitment Examination (CSRE) atema candidate 30,000 temai advertised posts 11 atema tokteper, aser külen additional requisitioned posts 43 atema MRC clearance mangu lir. Anungji additional vacancies nem cleared magütsü tashi tatidang thinena atatsü NSSB dang ayongzükur ta parnokisa ashi.

CTAN-isa Chief Secretary,



NSSB aser Chief Conservator of Forests nunger dang shiditem zülüogo.

CTAN-i Chief Secretary dangi züluba shidi nung November 30, 2023 tetuyuba meyipa agitsü shiogo. Parnokisa interview marks dak sendakba onük dendaktsütsü ashi kechiyong iba ya maliba ajanga interview panels-i marks agütsüba nung tashi ulura angur ta ashi.

CTAN-isa NSSB kübok Pay Level 3, 4 aser 5 posts dendaktsütsü shiogo. NSSB Regulations, 2020 nung Schedule-A kübok iba ya maden ta parnoki shisem.

September 15 memorandum nung points 2(a) nungi 2(f) agientsüla, talisa mapa nung maniokdang MRC aser Cabinet clearance nüngdaktsü enoka aliba agientsüla. Iba ajanga recruitment atsülangtsü aser NPSC o NSSB-i independent recruitment bodies ama inyakba nung kongshitsü ta CTAN-isa ashi.

Department balala nung NSSB nung madenba Group C posts ajak NSSB kübok adentsüla. Iba nung police,

prisons, Nagaland Lokayukta, police telecommunications, Home Guards and Civil Defence, Fire and Emergency Services, Excise aser Forest dena lir ta CTAN-i ashi.

Ano, nübo nüngdakba department temi MRC aser Cabinet dang nungi temelaba meshir contractual, fixed-pay mesüra co-terminus appointments asütsü lateta aliba anentsüla ta CTAN-isa metetdaktsü.

CTAN-i Chief Conservator of Forests nem Forest Department recruitment atema nenshiba shidi ka zülüogo.

Forest Guard posts 83 indang advertisement asütsüla kechiyong October 2026 tashi ita trok tsungda nung advertise asütsü nangzüka lir ta CTAN-i ashi.

Parnokisa Forester-I recruitment aser recruitment rules osang tejanga meshiogo.

Sorkari manpower rationalisation exercise anema menokdaker saka onük kar enoksemba ajanga recruitment process nung tetsükdaktsü agütsütsü akok ta CTAN-isa ashi.

Onoki lemsatepba onüktem agizüka mapa meinyakra yimdong nung lungkak aittsüsa akümtsü. Lanurtemia sorkar mapa dak dang metaloka melii entrepreneurship aser private sector nung shilem agitsü ayongzükur ta CTAN-isa metetdaktsü.

Telok balalai Dr. S.C. Jamir pusema nungiter; Naga nunger ajak temeten kasa lir ta nenshir

Dimapur, September 22, 2026

(TYO): Central Nagaland Tribes Council (CNTC), Watsü Mungdang (WM), Ao Senso Telongjem Chümoukedima aser Ao Youth Organisation Chümoukedima teloktemi sangdong balala ajanga Dr. S.C. Jamir aitsüba magizüker ta metetdaktsüogo.

Lt. Gen. (Retd.) V.S. Atem, Deputy Ato Kilonser & Member of the Collective Leadership of the NSCN (I-M), aser Rh Raising, Special Emissary to the Collective Leadership of the NSCN (I-M) nati yimjak nung Dr. S.C. Jamir anema jembiba atema sasa bilemtsür ta CNTC-i ashi.

Yimtenren ken o jembidang tangatetba balala lemsateper aser o atsütepa jembir saka Dr. Jamir anema olen kar kanga meshitaki jembioogo ta parnoki ashi.

Naga yimtenren mapa ya Naga nunger ajunga indang külem senmang lir. Tanü putu Naga nunger putiotsü nung Dr. S.C. Jamir ya taküm lia shilem

agir ka lir. Pa ya akhümtsübu agütsüba teintet rogo ka lir aser Naga nunger ama pai asen nübor yimtenren tarutsü atema jembitsü temeten lir. Naga nunger mashii ka indang temeten asadangba mesüra ila kümstüba ajanga temulung melemtap ang tali adokdaktsür ta CNTC-i ashi.

Naga nunger sobaliba tesayuba nung teintet rogotem kanga akhümtsübuttsü sayur aser baa ser putiotsü angateta olemteptsü tangatetba agütsür ta parnokisa ashi.

Nagaland nung alirtemi yimten latettsü atema kanga yongyaa aliba mapang Naga political groups, civil society organisations aser public lennirtemi kanga kümdanga jembishinütsü, kati ka akhümtsübutteptsü aser nija mangatettep toktsür ajaki hai haura akatsü tangatetba adoktsü merangtsü ayongzükur ta CNTC-isa ashi.

Watsü Mungdang-ia tanga sangdong ka nung taoba

Nagaland Chief Minister, taoba Governor aser Padma Bhusan angur Dr. S.C. Jamir pusamba metetdaktsüogo.

Naga nunger kija shiai Naga nunger aser tarutsü dak sendakba tebilemtsütem asoshi pei pei bilemba lemsateptsü temeten lir. Kija mesüra telok shingaia iba onük nung kibur akümtsü aser parnok dak dang temeten lir ama mejembitsüla ta WM-i ashi.

V.S. Atem aser R.H. Raising nati Dr Jamir anema jembiba aitsür. Maneni Achumbemo Kikon MLA-i ozü lennir S.C. Jamir mezügmeshia jembiba aitsür ta parnoki ashi.

Naga nunger shia yimtenren tesentaktep shir den lidir liaka mesüra tangatetba balaka süaka yimjak nung tetsübu mesüra tarentakba kecha melii jembitsü ayongzükur ta Watsü Mungdang-isa metetdaktsüogo.

Ao Senso Telongjem Chümoukedima aser Ao Youth Organisation Chümoukedima teloktemia Dr. S.C. Jamir

pusema nungitba meyong atema dang masü. Asen nübor tarutsü dak sendakba jembishinü unng Naga nunger shia jembitsü aser shilem agitsü temeten lir ta telok anatisa metetdaktsüogo.

Dr. S.C. Jamir ya Naga lima nung asoba jabaso ka lir aser Nagaland o linük nung alirtem küm aika tenzüka aruogo. Pai mapang talangka public tenzüka aser yimtenren nung ajangshia aruba ajanga pai Naga yimten tebilemtsü aser par nübortem tarutsü atema tebilemba lemsateptsü temeten agütsür. Naga nunger rongnung telok, political group mesüra kija shingaia parnoki dang jembitsü tashi balaka agüja mali ta ASTC aser AYOC-i ashi.

Dr. Jamir indang tangatetba nung hao ta mesüli ta asü nunga kecha masü. Pai ashiba onüktem anema o atsütepa jembitsü akok mesüra kulitem ajanga magizüksü akok. Ajisüaka pai ashiba magizüker ta sür pa Naga maitsü ashishiba mesüra pai jembitsü temeten mali ta asübaji tai. Naga yimten tebilemtsü ta Naga nunger ajak meyong lir aser telok, lennir mesüra aso ka

meyong atema dang masü. Asen nübor tarutsü dak sendakba jembishinü unng Naga nunger shia jembitsü aser shilem agitsü temeten lir ta telok anatisa metetdaktsüogo.

Nisung ajaki yimjak nung kati ka akhümtsübuttsü, aremzüksü aser akhüm keta jembishinütsü ayongzükur. Tangatetba balala süra olemteptsüla aser tajung bilema o atsütepa jembitsüla. Iba mapang asenoki Naga nunger temetentem, maitsü aser tarutsü kümzüka yur yimten latettsüba nung temulung agütsütsü nüngdaker ta Ao Senso Telongjem Chümoukedima aser Ao Youth Organisation Chümoukedima külem sangdong nungsa shiogo.

Onoki Dr. S.C. Jamir pusemer aser pa den külemi noktaker aser Naga nunger shia dak temeten aliba ama pa ola menembangtetsü mesüra pa yimtenren jenjang balaka asübayong tai ta meshitettsü ta parnokisa nenshia ashi.

Dimapur nung PIB Kohima-i media workshop 'Vartalap' ayongzüük



Dimapur, Rongjui/Sept. 22 (TYO): Press Information Bureau Kohima ajanga Mongulbarnü Hotel Saramati, Dimapur nung digital aser print media aser Tetso College nungi Mass Communication azünger kaketshir atema Cyber Suraksha Bharat nung media workshop 'Vartalap' ayongzüka liasü.

Iba workshop ya 'Legal Perspective on Defamation & Journalistic Responsibilities' aser 'An Overview of Cyber Crime in Nagaland' omen nung rangloker agia liasü.

Senden tenzüka Andrew Lachhandama, IIS, M&CO, PIB Kohima ajanga iba workshop ayongzüka nükjiong lemsatop aser Dimapur Press Club tir Henlly Phom Odyuo sentong akhumdong ka ama dena liasü.

Public Prosecutor, Dimapur, Temsunaro Jamir-i 'Legal Perspective on Defamation & Journalistic Responsibilities' onük nung ajemdaker jembidang Bharatiya Nyaya Sanhita (BNS) 2023 indang Section 356 kübok civil aser criminal defamation indang telemsa rateta ashi.

Osang abentsü atema tongtipang teinyaktsü temji osang shidak abenba, timi abenba,

talenba makai ochishia abenba ya lir, ta ashi. Lai media professionals dang okadak ken o benoka jembiba nung timtem ajurutsüsa 'media trails' malitsü aser aibelenba kuli tejangja mongutet tashi tai make tama züngshitsü ozüing tem agia ashir, ta ashi.

Lai Protection of Children from Sexual Offences (POCSO) Act nung aliba ama shidak inyaktsü rateta ashi aser tanur ka maitsü temai madoki miimbanga ayutsü ya ozüing nung shia aliba teinyaktsü lir, ta nenshia ashi.

Osangbener lendongi maitsü asoshi "Right of Reply" shidak bendentsü, raw source materials ayutsü aser nüburi aginüba ama tangatetba tajung nung osang tejangja bushitsü shia liasü.

Officer-in-Charge, Cyber Crime Police Station, Police Headquarters (PHQ), Nagaland Kihika Chishi-i 'An Overview of Cyber Crime in Nagaland' onük nung ajemdaker jembia liasü.

Pai state nung digital teblemstü tali akumba indang tejangja lemsatopa liasü. Nagaland nung cybercrimes shilem 80-85 shi Dimapur aser Kohima nungi lir, ta pai ashi.

Cybercrime ya technology

nung metokmeperiba kisung nung matemer aser nisung mulungsentsü mashi lenmangi anisar aser phishing, smishing, vishing, digital arrests, investment scams, aser taila loan applications ama social engineering techniques ajanga inyaker, ta Chishi-i ashi.

Osang aser shidakba awareness tsüingta telemsa nung rangloker jembidang pai nüburttem aser osangbener tem dang personal cyber hygiene, talisa Multi-Factor Authentication (MFA) amshitsü, temeyong agi manemdang mesüra melemsa dang sources jangjatsü, aser senotsü tsütsü ashikülakba lira itangjisa national helpline 1930 mesüra cybercrime.gov.in portal nung metetdaksütsüla, ta ashi.

Pai ano osang tiazi aser olulu prokshiba dak sendakba nung Bharatiya Nyaya Sanhita (BNS) indang Section 353 rateta ashi aser osang madoktsüdang kanga junga jangjateptsü nüngdakba shia liasü.

Sentong tembanga media practitioner aser shisalen sayurtem tsüingta tasüingdangba aser telangzüba mapang agia liasü.

Dimapur nung tasü mang ka nguteta lir

Dimapur, Rongjui/Sept. 22 (TYO): Mejangjaba nisung (tebur) tasü mang ka Rail bazaar Dimapur nung lir ta September 22, 2026 anepdang 10:30 ako meta Sub-Urban PS dangi telephone ajanga osang ka aru. Osang angazükba den külemi PS personnel tem iba tesem tonga ao aser tasü mang meita bushiba mapang iba nisungba ya yaseta asüba südi ta temulung melemtetba jangjateta liasü, ta Dimapur Police sangdong ka

ajanga ashi.

Ozüing agi melaba maparen ajak renema inyakba sülen tasü mang ya PM examination/identification atema District Hospital Dimapur Morgue nung bener oa lir.

Kibur/kinunger/tembar temi Officer-in-Charge, Sub-Urban Police Station, Dimapur den Mobile No. 7085055026 ajanga tongteprateptsü ayongzüker, ta sangdong ajangasa metetdaksü.

Tanü Dimapur nung field functionaries atema training agütsütsü

Dimapur, Rongjui/Sept. 22 (TYO): Census 2027 kübok District Census Handbook (DCHB) atema Village/Town Directory yanglutsü atema field functionaries asoshi training sentong ka Deputy Commissioner & Principal Census Officer, Dimapur ajanga agütsütsü.

Dimapur Sadar, Dimapur Municipal Council aser East Dimapur indang field

functionaries asoshi training ya September 23, 2026 nü Circuit House, Dimapur nung agitsü, ta Deputy Commissioner & Principal Census Officer, Dr. Tinojongshi Chang, NCS-i metetdaksü.

Iba training ya anepdang 9:30 nungi nikongdang 5:00 ako tashi alitsü, anungji field functionaries ajak iba sentong nung adentsü metetdaksür, ta sangdong ajangasa ashi.

District balala nung Draft E-rolls sayaogo

Dimapur, Rongjui/Sept. 22 (TYO): Census 2027 dak sendakba nung Nagaland nunga district balala indang Draft Electoral Rolls adoktsüogo.

PHEK: Phek district kübok 16-Pfutsaro A/C, 17-Chizami A/C, 18-Chozuba A/C aser 19-Phek A/C indang Electoral Rolls ya Registration of Electors Rules, 1960 nung aliba ama renema AC shia indang E-rolls ya EROs, AEROs aser BLOs offices tem nung angutsü, ta sangdong ka ajanga ashi.

Electoral rolls renemtsü atema qualifying date ya 01.10.2026 alitsü, anungji E-rolls nung tenüng inoktsü, metongshitsü mesüra melenshitsü lira, tapet Form 6, 7 mesüra 8 nung 20.10.2026 tashinung agütsütsüla.

Metongshitsü mesüra melenshitsü lira itemji pei EROs, AEROs aser BLOs indang office nem agütsütsüla mesüra post ajanga ERO/AERO/BLO dangi yoktsüla, ta ashi.

PFUTSERO: Election Registration Officer 16 Pfutsaro A/C ajanga sangdong ka nung Registration of Electors Rules, 1960 nung mela aliba ama electoral roll renemogo aser office mapang ERO, AERO aser BLOs ket nungi meshia repringtetsü, ta ashi.

CHOZUBA: 18-Chozuba Assembly Constituency indang Electoral Registration Officer ajanga September 20, 2026 nü

draft electoral roll adoktsüogo ta metetdaksü. Registration of Electors Rules, 1960 nung aliba ama electoral roll ya renem aser office mapang office of the Assistant Electoral Registration Officer aser Booth Level Officers ket nungi meshia repringtetsü,

Electoral Roll renemtsü atema qualifying date ya 01.10.2026 alitsü, anungji tang renema aliba E-roll nung melenshitsü mesüra metongshitsü lira 20.10.2026 tashinung Form 6, 7 mesüra 8 nung agütsütsüla, ta metetdaksü.

KIPHIRE: Photo Electoral Roll 2026 indang Special Intensive Revision (SIR) agiba dak sendakba nung Kiphire District kübok 59-Seyochung-Sitimi aser 60-Pungro-Kiphire Assembly Constituencies indang Draft Electoral Roll adoktsüogo aser qualifying date 01.10.2026 asütsü, ta Office of the Deputy Commissioner & District Election Officer, Kiphire sangdong ka nung ashi.

Draft Electoral Roll ya repringtsü asoshi Assembly Constituencies indang Offices of the Electoral Registration Officers (EROs) aser Booth Level Officers (BLOs) ket nung lir.

Iba Draft Roll nung melenshitsü mesüra metongshitsü lira October 20, 2026 tashinung Form 6, 7 mesüra 8 amshia pei Electoral Registration Officers ket tongtsütsüla, ta ashi.

Award angusang director Theja Rio Delhi Airport nung agizük



Theja Rio Brehostibarnü Indira Gandhi International Airport, Delhi tonga aruba mapang Angami Krotho Delhi aser temulunger temi agizükdang tangokba noksa nung angur.

Dimapur, Rongjui/Sept. 22 (TYO): Toronto International Film Festival (TIFF) 2026 nung Platform Competition takok ngua state aser linük tejak tentetdaksüba sülen Angh film indang director Theja Rio pela agizükba sentong ka September 22, 2026 nü Delhi Indira Gandhi International Airport nung Angami Krotho Delhi ajanga ayongzüka liasü.

Director ka ama Theja Rio asoshi iba Angh ya film mezüing alitsü, aser taküm TIFF indang Platform Competition atema India nung film iba ya kisung shima liasü.

Platform ya TIFF indang premier competitive sections ka

lir aser ibai auteur-driven competition koba director tem tasü tait ola aser cinematic storytelling balaka atema lir, ta sangdong ka ajanga ashi.

Platform Competition akokba ajanga Angh ya Academy Awards nung International Feature Film Category atema pa-sasa qualify asür.

Iba film ya Nancy Nisa Beso aser Theja Rio nati yanglu. Iba film ya alima sapang aser linük nung Jungle Book Studio ajanga prokshir aser TIFF world premiere atongtsü lia alima nung iba film ayoktsü temeden Jungle Book Studio-i alizüka liasü.

Iba otsüsütsü takok anguba

indang jembidang, "Ibai ni aser film den sendaktepa alir ajunga asoshi mapang khenyongi balaka lir. Debut film kati iba ama tetushi angutsü ya tasak lir ta ni meteta lir, aser Angh ya onoki temeim agi ni aruba tesem, ozü nüburttem aser ozü sobaliba atema yanglu ta shiteterm" ta shia liasü.

Angh ya Nagaland nung 1960s mapang atalokba otsü ka lir, koba Konyak yimtsüing ka nung tekolakba tain kumer aser par jabaso indang otsü lir. Angh ya 16mm film camera agi tangok aser iba film nungya BAFTA winning actor Douglas Henshall den Naga nung cast tem dena lir.



Deputy Commissioner, Shamator indang Conference Hall nung September 22, 2026 nü District Census Handbook for Village and Directory for Field Functionaries indang training alidang SDO (C), Shamator, Athrong-i jembiba mapang tangokba noksa nung angur.



Expanded Perunthalaivar Kamaraj breakfast scheme amenokba mapang Tamil Nadu Chief Minister Vijay kaketshirtem den breakfast achiba noksa nung angur.

October 16 nü state 3 nung Rajya Sabha election agitsü

New Delhi, Rongjui/ September 22 (Agencies): Election Commission of India (ECI)-i Mongolbarnü sangdong ka ajanga, Uttar Pradesh aser Uttarakhand nungi Rajya Sabha menden 11 atema election aser West Bengal nung menden ka atema by-election agitsüba anogo sangdongogo. Uttar Pradesh nungi menden ter aser Uttarakhand nungi menden ka ta tang MP tem term ya November 25 nü tembangtsü. Uttar Pradesh nungi Samajwadi Party lenir Ram Gopal Yadav aser Union

minister Hardeep Singh Puri, BJP nungi Arun Singh, Geeta Shakya, Neeraj Shekhar, Brij Lal, aser Seema Dwiwedi, BSP nungi Ramji Gautam, aser Union minister of state Banwari Lal Verma nunger term tongogo. BJP nungi Dinesh Sharma shiemer aliba menden ka September 11 nü tazüung kümogo. Uttarakhand nung BJP nungi Naresh Bansal indang term ya kasa anogo tembangtsü. West Bengal nung actress Rukmini Mallik-i July 16 nü menden toktsüba sülen election agishitsüsa kümogo.

Iba election shibai kokdir pa/la 2032 küm April 2 nü tashi inyaktüsü. Osang ajanga ashiba agi, election atema osang September 29 nü agütsütsü aser nomination ya October 6 nü tashi nungbo file asütsüla. Nomination tem ya October 7 nü asadangtsü aser iba sülen October 9 nü tashi nung candidate temi atsüngintettsü. Election agitsü nüngdaka kümra October 16 nü anepdang 9 nungi nikongtsütsü 4 ako tashi agitsü aser vote 5 ako nung azüngtsü. Inyakyim ajak ya October 19 nü tembangtsü.

Ex-Punjab MLA Ravinder Brahmpura AAP nung denogo

Chandigarh, Rongjui/ September 22 (Agencies): Tawa Shiromani Akali Dal nungi mintokba taoba mapang MLA Ravinder Singh Brahmpura Mongolbarnü Punjab Chief Minister Bhagwant Mann matsüngdang Aam Aadmi Party nung denogo. Khadoor Sahib constituency nung party anema inyaksangshiba atema Brahmpura ya SAD tir Sukhbir Singh Badal-i September 15 nü party nungi mintoka liasü. Brahmpura ya taoba Akali MP asür Ranjit Singh Brahmpura'er jabaso lir. Ravinder Brahmpura ya

Khadoor Sahib constituency nungi MLA liasü. Mann-i Ravinder Brahmpura aser pa pusemertem pelashishia agizükogo. "Punjab terenlok asoshi nükla yur aliba nung tanü Majha yimden yimsüsüba kibong nungi jakzüksang Aam Aadmi Party nung denogo. Onoki Ranjit Singh Brahmpura'er jabaso aser Khadoor Sahib nungi taoba MLA Ravinder Singh Brahmpura aser pa pusemertem pelashishia agizüker," ta Mann-i ashi. Pa aser pa pusemertem adenba ajanga party grassroots

level nung tashi itshiogo, ta paisa shisem. "Nüburtem anema inyakba policy tem agi lakteter nüburtem shirnoki Punjab atema nokdaker parnoki party-i aniba ochishiba sorkar pusemdar," ta Mann-i ashi. "Onoki item lenirtem nem akhüm tsübu agütsütsü aser parnok party nung dena Punjab yimjiyimjung dangi anitsü langa lir," ta paisa shisem. Punjab nung taruba küm tetenzüklen election agitsü lir. taruba election nung AAP sorkar tsükdaktsütsü atema Congress, SAD aser BJP amala opposition party tem renemdar.



New Delhi nung arishi küm 17 tain ka dak tim mesüi kongshiba sülen Kalkaji Mandir aser ISKCON Temple na tsüngda park ka nung longbanger aliba tesem ka nung police tem nokdaktepa aliba noksa nung angur. Aija alirtem rongnung ka police den khatepba sülen puogo.

Sübokrem agiba ken o nung taoba Kerala CM bushisündangtsü tuyu

New Delhi, Rongjui/ September 22 (Agencies): Enforcement Directorate (ED) indang report dak ajemdaker CMRL sübokrem ken o nung taoba chief minister Pinarayi Vijayan, par jala Veena T aser kinungbo P A Mohamed Riyas nunger anema bushisüngdang asütsü Keralam sorkari tetuyuba agütsüogo.

Home minister Ramesh Chennithala-i osangbenertem dang ashiba agi, state sorkari director general of police (DGP) Chandrasekhar dang iba ken o nung Vijayan aser tangartem anema bushisüngdang

"Ken o ya kechi koda bushisüngdang asütsü aji DGP-i telemtetba agitsü," ta pai ashi.

Ken o dak sendakba nung ED-i ngutetba balala dak ajemdaker attorney general (AG) Jaju Babu-i state sorkar nem temzüng ozüng dak ajemdaker shisatsü kar agütsüogo. ED-i ochi mashi inyakyim aser sübokrem agiba kulitem kaktetba asadangba sülen Vijayan aser tangartem anema bushisüngdang asütsü AG-i tetuyuba agüja liasü, ta osang ajanga metetdaksü.

Cochin Minerals and Rutile Limited (CMRL) nungi taoba

chief minister yagi sübokrem agiba ngutetba kuli dak ajemdaker ED-i iba ita tetenzüklen Vijayan aser tangartem anema ochi mashi ken o ka benoktsü atema state DGP den tongtepratepa liasü. Par jala Veena T indang IT firm Exalogic koba tangbo shibangogo, iba ajanga sübokrem agizüka liasü.

ED-i ashiba agi, minerals sector nung company nem teyari agütsütsü asoshi iba private firm nungi Vijayan-i sübokrem sen crore 3.28 agizüka liasü. Agency yagisa, sen ya Veena kinungbo Riyas-i teyari agüja 'hawala channel' tem ajanga bendangleni yoka liasü, ta ashi.

Ken o ya CMRL-i Veena indang firm Exalogic-i mapa kecha minyakaka ita shia sen agütsüba koba sen crore 2.78 junga liasü iba dak sendaka lir. Serious Fraud Investigation Office (SFIO)-i ken o bushisüngdangogo aser Ernakulam district nung okadak preliminary report ka benokogo. Ken o nung Veena aser CMRL nungi ketdangsürtem aitsüogo. Kasa mapang nung CPI(M)-i ashiba agi, iba ya Bharatiya Janata Party (BJP)-i aniba Union sorkari opposition lenirtem anema jenjang agiba kuli ka lir.

[See Regulation 33(2)]

OFFICE OF THE RECOVERY OFFICER -/II

DEBTS RECOVERY TRIBUNAL GUWAHATI

Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam)

DEMAND NOTICE

NOTICE UNDER SECTIONS 25 TO 28 OF THE RECOVERY OF DEBTS & BANKRUPTCY ACT, 1993 AND RULE 2 OF SECOND SCHEDULE TO THE INCOME TAX ACT, 1961.

RC/87/2025

ARCIL

Versus

MESSERS TRIBAL ENTERPRISE ODYUO

To

(Cd 1) Messers Tribal Enterprise

C K Arcade, Opposite Post Office Kohima, Nagaland-797001.

(Cd 2) Sri Zarenthung Odyuo

Son Of Moyithung Odyuo, Proprietor Of Messers Tribal Enterprise, Resident Of Upper PWD, NH 39, Kohima Nagaland-797112.

(Cd 3) Mrs. Merenla Odyuo

Wife Of Moyithung Odyuo, Resident Of Upper PWD. NH 39, Kohima, Nagaland - 797112.

OA/154/2019 dak sendakba nung DEBTS RECOVERY TRIBUNAL GUWAHATI nung Presiding Officer-i tuyuba nung ajemdaker Recovery Certificate nung aliba ama na anema (Jointly and severally/ Fully/Limited) Rs. 23625819.64 (Rupees Two Crore Thirty Six Lakhs Twenty Five Thousands Eight Hundred Nineteen And Paise Sixty Four Only) sentsüh den pendentelite aser 01/03/2019 nungi tenzüka sentsüh mouma tashi ita shia sen tetemlok @ 18.00% den cost Rs. 150000 (Rupees One Lakh Fifty Thousands Only) lir.

1. Amount due as per the Recovery Certificate:Rs. 23,62,5819.64

2. Interest from 01.03.2019 to 01.12.2025@ 18.00%Rs. 3,47,82,616.81

3. Court fees and legal feesRs. 1,50,005.00

Total:-Rs. 5,85,58,441.45

Recovery(-)Rs. 00.00

Rs. 5,85,58,441.45

2. Osangkaket nung iba sangdong agütsüba asülen anogo 15 tsüngda tekalen shia aliba sentsühji agüjang ta nü dang tuyur, yamaji mesüra sentsüh alangzüksü atema Recovery of Debts Due to Banks and Financial Institutions Act, 1993 aser Temzüngtem nung aliba ama inyaktüsü.

3. Taruba ken o mangadangsa affidavit ka nung nü kiojen sangdongang ta tuyur.

4. Maneni ken o angadangtsü atema nü dang tsünglanglen sign süa alir matsüngdangi 25.11.2026 anogo nung anepdang 10:30 ako tashi nung arung ta tuyur.

5. Temalen shia aliba senotsü dak alia nai item senotsü-a agütsütsüsa akümtsü: (a) Iba certificate/execution proceedings indang notice agütsüba mapang nungi tenzüka sen tetemlok. (b) Iba notice aser warrant agütsüdang indokba costs, charges aser expenses ajak aser sentsüh alangzüksü atema inyaksangshidang indokba senotsü ajak agütsütsüsa akümtsü.

02.09.2026 anogo nung tsünglanglen kü meyongnem aser iba Tribunal indang seal agütsür.

Sd/-

Recovery Officer II

DEBTS RECOVERY TRIBUNAL GUWAHATI



TIR YIMYIM YIMOBILEM (EDITORIAL)

DIMAPUR WEDNESDAY, SEPTEMBER (RONGJUI) 23, 2026

SIR ya junger

Tang linük ajunga den külemi Nagaland nung Special Intensive Revision (SIR) sentong ajanga electoral roll nung vote agütsütsü purtem talidak aser tenüing jangjashia reprangshiba sentong ya junger, kechiyong iba yagi tesem aika nung electoral roll nung tenüing meshitaki zülüoka aliba tenüingtem ajak agiener aser akok tashi electoral roll nung nisung shitak zülüoktsü meranger. Aji oda, asenok asoshibo ibai 'Clean Election' sentong tenzüker asütsü. Nagaland nung ya asenoki mapa aika ochishia meinyakteter aser itemji karbo metetsümonga inyakba masü saka asenok mashimalu aser asenok onsara tongmelang asüba agi meshitak ser nung shitak amai bilema inyakbatem lir. Aji oda, akhidang tain kümerang kaketshidaki aoba mapangbo tasoba anogoa tesayurtemiang asüngdanga zülüoktsü, kechiyong nisung aikati tasoba anogo memeteti liasü aser tejangja meteta alirtema pei tasoba anogoji shitak zülutsü nungbo pa mesüra laji züngtemer government mapai ai nungbo mapang talangka meinyaktetsü ta aria bilema tesayurtemi nisung aika pei tasoba küm aser anogo aika süktoktsür, küm aika agi tanutsü aser tanubo küma zülüoktsü. Iba jagi tanü tashi nisung aika arishi kümba neter jungdi asüyonga government mapa nungi anentsüba kümba matonger. Atangji, nisung karbo metetsümonga tiyazü jembia pei tasoba anogo melenshiba purtema lir, iba jagi lanurtem dang len tai sayur. Iba kasaji, election mapang vote enoktsütsü asoshi tenüing zülüokba Electoral roll nung tamasabo nisung ajaki pei tenüing pei alidak ken dang zülua alitsü südi, kechiyong akhi mapangbo asenok ya tongmelang aser ochishia alitsü merangertem liasü. Ano, ibaji dang masü saka nisung kar pei yim toktsür oagi bendanglen government mapa inyaka aliba dak alaka, nisung teimba pei yimtak dang liasü, anungji tesem ana asem nung pei tenüing electoral roll nung alitsübaji tamakoktsü liasü. Iba denji, nisungtem tangatetba tongmelang aser ochi asünungji, pei yimtak vpte aika asütsü asoshi tiyazü nisungtem tenüing dena electoral roll nung enoktsübaji tebilema meblem aser election anogo nunga tangar vote aseni enoktsütsübaji taaktsü mapa ka liasü. Ajisüaka, lia lia asen lima tangar lima ama renloka aodang, nisung aika pei yim toktsür bendang tesem balala nung mapa tapu balala inyaka alitsü tenzü. Iba mapang, meteta aser memeteti nisung aika tenüing pei mapa inyaka alidak electoral roll nung zülüok aser ano pei yimtsüing nunga zülüok, anungji nisung aika tenüing electoral roll nung khien dak tali zülüoka liasü. Ano, ibaji dang masü saka asenokbo election agiba politics ya party politics masü saka yimtsüing politics dang asünungji, yimtsüing shia pei yimtsüing nung vote aika asütsü merangdang, pei yimer bendanglen alirtema zülüoker, ano küm 18 majungertema zülüoker, ano alima nung masoba nisung tenünga bener arua zülüoker aser tasürtem tenüingbo magiener ta asen lima nung election agia - agia asenok asoshibo tiyazüang shitak aser shitakang tiyazü ta aküm. Aji oda, ochi agi akoktsü meranger masü saka tiyazü agi akoktsü merangba agi tanü asenok takok ajak ya tiyazü kümer tagitsü mapa meinyakteter. Ibaji meteta asenoki asenoksasa merüktetsü meranger saka makoker ta alidang, tang SIR ajanga electoral roll Adhar number dena amshia reprangshiba ya asenok asoshi takok tuluka asütsü. Atangji, alima asünungji noklang nung noklangbo shitaka tabo masütsü saka asenok dak ochishia linüba aser shitak dang inyaknüba shisatsü lira, iba jagi asen lima nung temelenshi tajung tuluka bener arutetsü.

OLEMSABANG

AO OSHI TAMENTAKDAK ASER LIRUMEDEM

~ Mr. I. Temjen Tzüdir (Source : Nokinketer)

Okila: Oshi tetezü nübur tsüingda koba yimya agi südir süaka angatettepba dangji "oshi" ta ajar ((Narongjaker=Sign language aser Nükpoker=Braille, ano item dak alaka temang arakzüba agia jembiba lir ta ashitsü akok). Jungjunga asadanga ora, oshi ya meimchir tsüingda angatettepa alitsü atema Tsüngremer angati senpet aser temoatsü. Anungji shiba mesüra shir ajanga kin ka oshi nung mangatettep aser tebenja adokdaktsüdir parnokjibo Tsüngremer senpet tajung raksatsür asütsü. Oshi kaji küm ka ana nung yanglutetba mesüra puratetba ka masü, mapang agia oshi kaji renloka ainer, ano samatsü asünunga kasaji tanem tanemi mapang agia sama-a aotsü. Anungji asen Ao oshi ya tebenja makai yangluteta aotsü Aor ajak khuret asütsü merangdi.

Yimya agi, Oshi medemra nisung tsüingda pelateper, lemsateper aser yariteper. Oshi memedemra libalirutsüa tasak aser timtema lir (Tat. tetsü kati pei jabaso nem lai angatetba oshi ashir dang agidaktsünür), Oshi nung tashi aser akhüm lir. Asenok ajak tia majung Ao oshi zülumen langrara-a (1980s tashi) senzuka toktsü aser iba jagi tanü asenok yamai timtemteper. Tanü asenokia zülumen memedemba ya tanemi toktsüra asüing asen chirnur aser semchirtem tanü dang nungi timtem aser takoksa-a tulu ajurutsü ana nung lir. Tang onükji asen oshi nung süaka tetezüji angatetsü merangra;

"Ao oshi" ta süra Aori jembiba oshi, "tamentakdak" ta süra koba nungi tenzü/kechi nung ametadaker aru aser "lirumedem" ta süra, julangjushi khenyongi mali, meputep mali, kati züluba kasaji tangar ka jagi-a zülutetba/jembitetba ta tatsü agi onük tetezüji angatetsü akok.

Tanabuba nung, tanü sentong ya tangar lima nübur kar oshioben indang jembiteptsüba masü saka asen oshi (Ao Oshi) indang tera asadangtsü onük jagi akanger. Asenok ajaki metetba ama asen oshi ya "Tibeto-Burman" oshi rongnung dena lir. Oshi rajemertemi ashiba agi Tebit aser Burma nungertemi jembiba ojang aika asenokia jembisemer aser parnokia jembisemer.

Iba den Naga nunger kin balala aika süaka ojangosü kar kar nungbo putepa aliba angatetsü akok.

Tamburi ashiba agi Zürepkong, Lungso putu nung alidang item nübur jagi süngjak nung noksa ayak tapu balala yanglua amshiba otsü lir, koba dang parnoki "Ngupi" ta aja. Saka parnoki itemji mesamatsüsa züingzunga zülua rizunga metoktsü, ibajagi item süngjak noksa aser ayakji aika samaatok südi ta bilemer. Ano asen tütsüteboutem Jungliyimtikong nung alidanga zülü balaka zülua amshiba züluyu kecha nunga akaba tang tashi nung mejangjar, saka mangkoteptsü aser tsüngkoteptsü amala nung noksa tapu balala amshibatem aser nisung temang nung teptsü atepba ya par mapangbo zülü küptok amai amshiogo ta tanü aseni bilemtsü/agitsü akok.

Ano tamburisa ashiba agi, alemli Lungso putu nungsa parnok tsüingda jateparaba aser menüshishi tanü amai mali asü saka;

Tebur tsüingda jatepba; Oh hoi, oh hoi ta, patong patong ta aser tetsür tsüingda; tongli tongli, rali rali ta jatepa aruba otsü lir.

Ano menüshishiba tsütsü-a yamaisa liasü; Teburi "Oh Shim, shim, shim ano khien khienbo mom, mom, mom" ta aser idangji, tetsüri "O-sak sak sak, o-sak sak sak" ta menüa ta jembia aru aser itemji asen oshioben nung tamentakdak jenjang ka asütsü. Saka tanü koma menüteper asenoki meteta lir.

Yangi alima nung mezüingbuba o jembiba zülua alibaji Lipok 1:3ff, Tsüngremi ashi, "Tesangwa Adokang..." süra yamai jembibaji kechi oshi agi jembir alitsü ama asenokia bilemer...? Tsüngremi mezüing jembiba oshiji, pai pa oshi agi jembia aser ibaji melentepa/meyipzüktepa arur Ao o nunga jembia aru aser tanü asenoka iba otsüoren nungjagi Laishiba aser kaketter balala nung zülua zünga jembiteper. Ano Lipok 10:31 nungji züingdangra "...pei pei kin oshi jembia liasü" ta angutsü. Süra asen tütsüteboutema kechi oshi jembia liasü ta aroka shisadangtsüa nüngdaker.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bengal nung Hindu nunger telok kati house church anaamak



West Bengal ung East Medinipur district kübok Dekhali Jalpai area nung September 20 nü Hindu nunger telok kati Deobar tekülem sentep meinpronga yimyim ayimdang tangokba noksa ka yangi angur.

Dekhali Jalpai, Rongjui/Sept. 22 (Agencies): West Bengal kübok tesem ana nung Hindu nunger telok kati sarasadem sentong ka amakba mapang pastor ka aser tetsür tem densema nisung kar yirua kin tila Khristanpur kanga jashiteper.

September 20 nü Hindu nunger tentet Bajrang Dal züngsem ta jembiba mejangjaba nisung 50 shi Medinipur district kübok Dekhali Jalpai area nung Deobarnü tekülem sentong agia alidaki arua sapang ta osangtem ajanga ashir.

"Parnok ya yimyim ayima house church telungi tashiyim amshia ait aser Pastor Chintamoni Midde küna dak azük tenzük," ta Bhagyadhar Jana-i UCA News dang September 20 nü ashi.

Parnoki tamangertem merenshi aser tekülem inyaksangshi tangsa manenra timtem tulu alitsü ta amokmerena liasü. Parnokisa Khristanpur dang iba tesem yutsür ainshitsü ashi.

"Ni teyari meshia jaokba sülen police tem arua parnok kumzük," ta yangji alir okatsür Aditya Tewari-i ashi.

Tensa tamajungba mekumdaktsütsü mechi timtem ashishitepba ken o benokba nung police temi ken o mezüluogo aser ni iba tesem indang legislator den jembitsü aser yimjung yanglutsü atema senden amentsü asoshi timtem agütsürtem jaoktsü, ta Tewari-i ashi.

Aji masüandang September 19 nikongdang 2:00 ako meta nisung telok ka iron bars aser süng amer North 24 Parganas district kübok Suryapur yimtsüng nung tamanger Puja Satyaki'er kidangi ait.

"Sarasadem sentong nung adentsü asoshi tangartem ataa liasü, saka nisung telok ka nungpoka aita Laishiba aser ken kaket raksatsü aser ki oset-a raksatsü," ta Khristanpur tenük kuli alir Sanjit Sarda-i UCA News dang September 21 nü ashi.

Bajarang Dal aser par parent organization Vishwa Hindu

Parishad (World Hindu Council) züngsem ta ashir temi küm ti shi nung tang mezüngbuba house church amaker alitsü, ta pai ashi.

"Satyaki, Arpita Sardar aser Jhuma Jana densema tetsür tekülem kidang alirtem dak züka merenshi," ta Sarda-i ashi.

Timtem ajurur alirtem ya anasa Mohanpur police station-i anir ao. "Police temi parnok ya medical tests atema anir ao ser iba sülen chioknüa liasü, saka ano nisung tekok kati police station lungbang," ta Sarda-i ashi.

Item nisungtem ya senshiba sülen ang parnoki kidangi ao.

Tetsür timtem ajurur alirtemi police nem ken o agütsü saka tang tashi parnok nem yangji meyongnem agütsür aliba copy kata magütsü, ta pai ashi.

Yimdak yimtsüngtem nung aliba house churches nung Honibar aser Deobar anogotem

tekülem sentong nung timtem agütsüba tali akumer, ta Bengal Christian Council indang founding secretary Herold Mullick-i ashir.

Sorkar aser ketdangsürtemi ola madoki repranga aliba ajanga Hindu nunger telok balala temulung uludaktsür," ta pai UCA News dang ashi.

All India Catholic Union indang odongtar John Dayal-i West Bengal ya Chhattisgarh, Odisha aser Uttar Pradesh ama akumer, kong Khristanpur anema azüdokshiba otsü tamajungtiba lir, ta ashi.

West Bengal Chief Minister Suwendu Adhikari aser Centre nung Home ministry ola madokba ajanga sorkar ketdangsür aser sorkar kumteta aliba Bharatiya Janata Party-i azüdokshi yarir ta Khristanpur temulung melemi lir, ta pai ashi.

Truth Nigeria-i ashi.

Iba asana Fan area nung alir Rose Istifanus-i ashiba agi, Dorowa Babuje yimtsüng kübok Maraban Kantoma area nung lendong atalokba mapang Rantiyidi village, Fan District nunga Khristan ka tepset.

Kasa mapang item lendong agütsürtemi anasa yimtsüng asem amak, ta Truth Nigeria-i ashir. Yangji aliba civilian anüker temi iba tesem kumzüka aser nüburtem anizüker aoba mapang police, army aser Department of State Services (DSS) personnel temi prangbong inoka aliba gari tem bener arua anti-aircraft prangbong tem anünglen khaloktsü, ta ashi.

"Police aser DSS personnel temi telungpur tem den kasa tokteptsü merang saka telungpur tashi tuluba liasü ta tenük kuli alirtemi ashir. DSS officer ka yiru aser police armored vehicle ka rqaksatsü," ta Truth Nigeria ajanga ashi.

Deobar nikongdang Mararabar Kantoma nungi jena aortemi Truth Nigeria dang ashiba agi, parnok aliba tesem amaker temi tongtipang lenmang ajunga sapanger jena

ANOGO ABEN TSÜNGREM DEN

Tanela Nisung

"Saka Tanela tejang ya, temeim, tepela, tesünep, taremzük, kümli tajung, tajungba, pei sasa azüokba, temulung lemtetba, ajemaluba. Item anema ozüng mali" Gal. 5:22,23.

Tanela Nisungjia temang, tanela kar. Ajisüaka, iba nisung temelenshiba nisung. Temulung meyipba ajanga pa tanela Tsüngrem Tanela den lungjema akümer. Iba telungjem nungi adokba taküm nung tadok anguba, Tsüngremer kibong nung agizükba, aser kija taküm jenjang angateta akümba tejangja temaitsü keta alitsü.

Tanela nisungji Tanela melenshitaktsüba taküm. Tanela nungi pa tajungshiba tashi angur. Pa shisatsü tasen küma yanglushir. Pa tejangraba nung tesüngjem aser tepela alitsü. Shi agi masü, Tanela agi jajatsü shimtsübaji asenok mapa.

Tanela nisung ka ama, ne temangji Tsüngrem alidak aser Tsüngrem ki. Asenoki asen temang taküm aliba tenla ki ama agütsütsüla. Tanela nisung shi yimya odang alir. Saka pai anogo shia shi tejangraba kangki nung angenloker. Tanela nisung ka indang ratettsübaji tetemjen. Ibai tanela nung ainba temaitsü lir. Tsüngrem o nung tanela nisung metettsü asoshi teratet teperi aguja lir (2 Peter 1:3). Na shi kangki nung angenloker Tanela Temeshi agi sünga alitsü angazükba ajanga ne temang nung Tsüngrem sentsüwangshidakja tanela nung aintsü akok.

Temeim Kibur, Ne Tanela kü dak alir ta metetbaji nüji, ni tanü Tanela nisung ka ama jajatsü shimdi ta asenoki Pa dang shidi.

Nigeria nung Baptist pastor aser tamangertem tepset

Abuja, Rongjui/Sept. 22 (Agencies): Fulani telungpur temi September 20 nü Nigeria linük nung Plateau state kübok county ka nung tamangertem tekülem kidangi aoba mapang amakdang Baptist pastor ka aser arogo nung inyaker ka densema Khristanpur nisung ti tepset, ta osangtem ajanga ashir.

Jos south tsütsü Barkin Ladi County nung aliba Dorowa Babuje yimtsüng nung azüdokshir temi tenüng mejangateti aliba pastor aser pa indang secretary tepset aser pastor indang jabaso ya yirutsü, ta Truth Nigeria ajanga ashir. Yangji alirtemi Christian Daily International-Morning Star News dang azüdokshir ya Fulani telungpurtem lir ta ashi.

"Dorowa Babuje jila anasa Maraban Kantoma area nung Baptist Arogo pastor ka Deobarnep Muslim Fulani kiralongrar temi tepset. Pa ya tekülem kidangi aiba mapang Fulani telungpuri khaset," ta Kara Dakup-i ashi.

Pastor'er jabaso ya kanga sashia yiru, ta US nung aliba Equipping the Persecuted agency ajanga ketdangsüba

aotsü lenmang makai kumogo.

Honibar nikongdang (September 19) Fulani telungpuri Gana-Ropp yimtsüng nung mita atar Khristanpur nisung pongu tepset, ta yangji alirtemi ashir. Asürtem ya arishi küm 43 tain Sadam Iliya, arishi küm 18 tain Umar, arishi küm 35 tain Talik, arishi küm 38 tain Benard aser arishi küm 37 tain Silim alitsü, ta yangji alir Jackdel Stephen-i ashi.

Aji masüandang Fulani telungpuri Rakok yimtsüng maka Khristan ka tepset, ta yangji alir Gomex Agwom-i ashi.

"September 18 nü Rakok village, Barkin Ladi Local Government Area nung temulung raksatsü lendong ka atalok. Yimtsüng nung Khristanpur tem mejanga aliba mapang Fulani kiralongrar temi Khristan ka tepset," ta Agwom-i ashi.

September 15 nü Fulani kiralongrar temi NTV yimtsüng maka Barkin Ladi jila anasa Khristan asem tepset, ta yangji alir Amy Katman-i ashi.

"Khristanpur mejanga alidang parnoki yimtsüng amak," ta Katman-i ashi.

Fulani telungpur yagi September 6 nüa Dorowa Babuje maka Khristan ka tepset aser ka yirutsü, ta yangji alir Danjuma Andu-i ashi.

October 1, 2024 nungi September 30, 2025 tsüngta Nigeria nung Khristanpur tepsetba ama tanga linük kecha nunga ataloka mali, ta Open Doors indang 2026 World Watch List ajanga ashir.

Iba mapang tamangba yimsü mechi alima nung Khristanpur 4,849 tepsetba nungi shilem 72 (3,490) Nigeria nunger lir, aser aji masüandang nisung 3,100 tepseta liasü. Alima nung Khristanpur alitsü asoshi linük tamajungtiba 50 asadangba World Watch List nung Nigeria ya jenjang 7 buba nung lir.

Muslim Fulani tem ya kin-kidong noklang dak tema Nigeria aser Sahel nung million aika lira ser parnoki extremist yimya mamshir, saka Fulani nunger kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung shia lir.

(Maneni tapak 7 nung...)

AO OSHI ANGAZÜKDAK:**TANÜ ANGAZÜKTSÜBA OJANG****Hoshipongshi**

(v) kibong tulu tajung agi tamakitsü kuma aoba
(Good and big family reduces to worthless family)

* Tsürabur majungba agi tanur ajak hoshipongshia odaktsü.

Hoshenangshi

(v) kibong mesüra kin tulu tagidak maka kuma lurepba
(degeneration of great clan or family)

* Kidong kibalembuba ajanga kin hoshenangshia kümdaktsür.



Tir Yimyim

OLONG PAITEP # 7658

1		2			3		4		5
				6		7			
8									
					9				
			10						
11									12
					13		14		
15									
16							17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7657 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER

Raaka film ajanga Guinness World Record ka yangluogo aser ibaji "Most People Motion-Captured in Real-Time" atema lir.

Iba film nung Allu Arjun aser Deepika Padukone nati tongti shilem agir aser performers 37-i külemi shilem agiba atema otsü yangluogo.

Arunachal Pradesh nung FMD ajanga mithun 267 süogo

Itanagar, September 22, 2026 (Agencies): Arunachal Pradesh nung ita ana tsüingda Foot-and-Mouth Disease (FMD) ajanga mithun 267 süogo aser shiruru 1,402 dak kongshia lir.

Dibang Valley district kübok yimtsüing 21 nung Foot-and-Mouth Disease (FMD) puteta lir aser veterinary ketdangsürtemi wara azüoktsü atema treatment, surveillance aser preventive measures inyaka arudar.

July ita tatemlen tashi nung

district nung FMD aliba osang mezüing angashia liasü ta District Animal Husbandry and Veterinary Officer Dr Dammo Riba-i ashi.

Mithun asüba osangtem angashiba sülen iba wara aliba tesemtemi veterinary teams yok aser parnoki mozü den sample-collection kits bener ao. Centre nungia subject experts telok kati FMD aliba yimtsüingtem semdangogo ta Dr Riba-i ashi.

Odisha nung aliba National Institute of Foot and Mouth Disease (NIFMD) nung

laboratory tests agiba ajanga FMD serotype 'O' ajanga iba wara adokba putetogo.

Iba tashidak ajanga September 20 tashi nung mithuns 1,402 tashi kongshia lir. Mithun 1,225 tashi anepaluogo aser 267 süogo ta departmental status report ajanga ashir.

Züingsem pezü agi akümba Rapid Response Team (RRT) den local veterinary personnel-i FMD tashidak adoka alidak treatment, surveillance aser awareness programmes agidar.

UCC ajanga Mizo tsürtem kümzüka ayutsü: Mizoram BJP MLA

Aizawl, September 22, 2026 (Agencies): BJP MLA K Hrahmo-i Mizoram nung Uniform Civil Code (UCC) jungjunga asadangtsü ayongzükgogo.

UCC ajanga Mizo tsürtemi non-tribal teburtem den kibong akümba nung ozüingi kümzüka ayutsü akok ta MLA Hrahmo-i ashi.

Aizawl nung BJP office

nung sentong ka nung jembidang Hrahmo-i Mizoram nung non-tribal nisungtem aliba nung ajemdaker UCC mapa tenzüksüla ta ashi.

Mizoram nung non-tribal tebur karbo kinungtsü ka den teimba lir aser Mizo tsürtem agir ta pai ashi.

Tatalokba kar nung item nisungtemi Mizo kinungtsütem shishilembaba maparen nung

amshir aser shishilembabaren takoksa ajurura parnok kinungtsü aser chirnurtem toktsür aoba ajuruogo ta MLA Hrahmo-i ashi.

UCC ajanga monogamy agütsür aser apuani balaba sülen rongsen lemsateptsü lateta lir. Ibala telatet ajanga Mizo tsürtemi non-tribal nisungtem den kibong akümba kümzüka ayutsü ta paisa ashi.

Assam süngolu inyakertemi Durga Puja jakdang 20% bonus meshir

Dibrugarh, September 22, 2026 (Agencies): Assam süngolu nung mapa inyakertemi Sharadiya Durga Puja jakdang 20% bonus meshia takhangba agütsüogo.

Sharadiya Durga Puja amungtsü hopta asem jakdang maximum possible bonus agüjang ta Assam Chah Mazdoor Sangha (ACMS)-i metetdaktsüogo.

Süngolu nung mapa inyaker

den 20% bonus agreements agia aliba company temji- McLeod Russel India Limited, covering 31 tea gardens; APPL (Toklai), 21 gardens; Goodricke Group, 14; M.K. Shah Exports Limited, 14; Luxmi Tea Company Limited, 13; Dhunseri Tea Company, nine; Gillanders Arbuthnot & Company Limited, six; Russell Tea India Limited, seven; Jorhat Tea Company

Limited, four; Shri Vasuprada Plantations, four; Madhuting Tea Company, four; M.K. Jokai, six; aser Asian Group Tea Company, two gardens lir.

Company kari taküm bonus instalments ana lemsar agitsü mulunga lir aser tanüingba company tem den taruba anogo ana nung agreements agitsü ta ACMS General Secretary Rupesh Gowala-i ashi.



Assam Governor Lakshman Prasad Acharya-i freedom fighter aser veteran educator Phanidhar Gogoi den ajurutepa tenüngsang agütsüba angur. Governor Acharya-i Dibrugarh nung arishi küm 96 tain Gogoi den par kidang ajurutepa liasü aser idangji Assamese gamosa, Rs 51,000 cheque, seleng sador, dhoti, umbrella aser basket of fruits agütsü. Iba mapa ya 'Governor Assam Varishtha Nagrik Samman' initiative kübok inyak.

Russia-i Ukraine indang industry balala amak; nisung 4 tepsetogo

Kyiv, Rongjui/September 22 (Agencies): Russia-i Ukraine indang industry balala amak aser iba mapang nisung pezü tepsetogo aser north len tesem ka amakba sülen nisung meyrejang aika power supply maka kümogo, ta Ukraine nunger ketdangsürtemi Mongolbarnü ashi.

Frontline nung rara anener aliba mapang Moscow-i tawa anüng ajanga industry, rongnendak aser logistics hub tem taliba maka arudar.

Moscow-i mapang ka nung dang Dnipropetrovsk kübok Dnipro, Kryvyi Rih aser Pavlohrad yimti maka liasü, ta regional governor Oleksandr Hanzha-i Telegram messaging app ajanga metetdaksü.

Iba tesem nung machine balala, steel aser tanga tongtimbang osettem yanglur.

Russia-i district pezü nung missile, drone aser artillery khaloktsü aser iba mapang Dnipro nung nisung pezü tepsetba den nisung trok yirutsüogo. Hanzha-i ashiba agi, iba tesem nung shishilembadak aser warehouse tem kanga mejungi raksatsüogo.

Russia-i, Oniks anti-ship aser ballistic missile tem, cruise missile pezü aser drones 121 yoka liasü, ta Ukraine indang air force-i ashi.

Kasa mapang nung Russia indang defence ministry-i ashiba agi, parnok sepaitemi Ukraine

nung industrial aser military facility tem den port infrastructure facility tem aser Ukraine military-i amshiba rongtem makogo.

Pavlohrad aser Kryvyi Rih nunga shishilembadak balala raksatsüogo, ta Hanzha-i shisem.

Chernihiv nung Russia-i energy facility ka amakba sülen nisung 100,000 shi power supply makai aküm, ta electricity distributor kati ashi.

Moscow-i, Poltava nung industrial enterprise aser tongtimbang infrastructure facility tem makogo, ta Governor Vitalii Diakivnych-i ashi.

Russia indang defence ministry-i ashiba agi, parnoki Poltava tesem kübok Kremenchuk yimti nung totzü asüngtetdak ka makogo.

Ukraine-ia meyipar Russia nung online retailer tem aser totzü asüngtetdak balala makogo.

Ukraine-i drone amshia Russia kübok Samara tesem makogo, aser iba mapang nisung ka tepsetba den nisung pezü yirutsüogo, ta local governor-i ashi. Iba tesem nung totzü asüngtetdak amala tongtimbang facility tem amenoka lir.

Russian defence ministry-i ashiba agi, parnok indang air defence unit temi Russia kübok tesem balala nung drone 297 raksatsüogo.

KHRISTAN OSANG : Tapak 5 nungi...

Nigeria nung Baptist pastor...

"Parnoki Boko Haram aser ISWAP tasa den mesüktepa amshir aser Khristanpur aser Khristanpur maitsü nung tenük yokba tejangja sayur," ta APPG report nunga shi.

Shiruru metsürtemi Nigeria indang Middle Belt nung Khristanpur dak amakba ya tashiyim amshia Khristanpur ali rakzüka Islam benoktsü nükjidong nung lir, kechiaser lisem lima akumba ajanga parnok meyong shiruru tem takum süa alitsü tasak akumer, ta Nigeria nung Khristan lenirtemi ashir.

Khristanpur ya North-East aser North-West dang nungi

North-Central zone nung timba lir, kong Islamic extremist Fulani telungpur temi aluyimer dak amakdang nisung noklang aika tepseter aser itemji timba Khristanpur lir, ta report nung ashi.

Boko Haram aser Islamic State in West Africa Province (ISWAP) nungi razüka aoba jihadist telok tem linük north tsütsü kanga yakyaka lir, kong federal sorkari yimsü asüba tesem aikabo mali aser parnoki Khristanpur dak tenük yoker lendong timtem balala agütsür. Senotsü meshitsü mechi pua bener aoba tang tali kumogo.

Houthi teloki Saudi amakba anentsü G7 foreign minister tem akhang

New York, Rongjui/September 22 (Agencies): Group of Seven (G7) linüktem nungi foreign minister temi Yemen nung Houthi teloki Saudi Arabia amakba aitsüogo aser ashiba agi iba ya agizüksü makok.

Hombarnü New York nung United Nations General Assembly senden amenba mapang G7 minister tem senden ka amenba sülen iba taitsüba ya metetdaksüogo.

"Yemen nung amendaker aliba Houthi teloki Saudi Arabia tanen makai amakba onoki ajang ajanga aitsür," ta UK, Canada, France, Germany, Italy, Japan aser United States nungi minister temi külem

sangdong ka ajanga metetdaksü.

Minister tem yagi Houthi telok dang Saudi amakba aser iba den civilian rongtem amakba tangsa tang anentsü aser sensaksem nung shilem agitsü ayongzüko.

Parnokisa Iran dang iba telok nongita meyaritsü aser parnok nem prangbong injang magütsütsü ayongzüka den Iran-i taoba mapang UN Security Council bangzüng anema inyaksangshir, ta ashi.

Maneni parnoki ashiba agi, Iran-i Houthi telok nem teyari agütsüba ajanga tensa tamajungba akümer, aser iba ajanga international shishilemba nung kongshia alima ajunga

tamendakdak anakshitsür.

2022 küm UN teyongtsüi ia Iran-i teyari agütsüba telok aser Saudi-i teyari agütsüba Yemen sorkar na tsüngda ceasefire ka benokba sülen küm ishika linük süngjem süngjema aruogo, saka tang asendenshir tensa tamajungba küma odar.

Houthi telok telok yagi Yemen nung tongtimbang tesemtem atsünga aotsüba merangba mapang alima kintemi agizüker aliba sorkar den raratepa arudar. Parnoki Temerem tzüyim nung Saudi indang rongtem mesenzüdaksütsü atema tenokdangba agütsüogo, aser iba ajanga totzü shibelenba nung tetsüdaksü adoker lir.

Sri Lanka nung Easter Sunday bomb lendong mechi nisung 15 aitsüogo

Colombo, Rongjui/Sept. 22 (Agencies): Sri Lanka nung 2019 küm Easter Sunday mapang nisung 270 tepseta nisung 500 dak tema yirutsüba tasa yanglurtem ta ken o benokba nung High Court-i nisung 15 aitsüogo.

Aibelena aliba nguteter rongnung Nauffer Moulavi dena lir, shiba iba suicide bombings tasa yanglur tetsüti lir ta prosecutors temi ashi. Nisung toku temeden angu.

Tekülem ki asem aser luxury hotels asem nung osang agitepa bomb tesashi pokdaksüba ya 2009 küm civil war tembangba sülen Sri Lanka nung lendong tulutiba liasü. Asürtem rongnung bendanger 45 liasü.

Iba lendong nung bomb pokloktsür ajunga itangji asü. Taoba mapang bushisüngdang temi iba bomb lendong asoshi Islamist extremists tenüng sena liasü, aser iba ken o nung tai tongloktsür nisung 25 ya Muslim minority nungi liasü. Ka tepuokdak asü.

Obendang magütsüdang court session tembangba liasü.

Tai tonglokja alirtem yagi 23,000 dak tema aibelen mapa inyak ta ken o benok aser parnok ya nisung ana-na teka alener prison bus ana nung mener linük yimtiba Colombo nung High Court dangi anir arua liasü.

Iba lendong nung asürtem ya timba Sri Lanka nunger aser aika tanurtem liasü.

Asürtem rongnung celebrity chef Shantha Mayadunne aser lar jala, kibong ka nungi züngsem ponguprong, hotels tem nungi staff ti, Sri Lanka anüolen Negombo yimti nungi kibong ka nungi nisung pongu dena asü.

Bendanger asüba nung India nunger 11, Britons ti aser America nunger pongu dena liasü.

Asürtem rongnung Australia, Bangladesh, China, Denmark, Japan, the Netherlands, Portugal, Spain, Sweden, Switzerland aser Turkey senso tema liasü.

Shangri-La hotel amakba nung Danish billionaire Anders Holch Povlsen'er tanur asem asü, kong parnok südoksünema munga liasü.

Iba lendong atalokba sülen Sri Lanka ketdangsür temi itdangiterba nung tapok tulu aliba nung tai tongloktsü. Lendong agütsütsü ta India nungi itdangiter osang yokba ketdangsür den shidak melemsa, ta parliament nung jembia liasü.

National security tamakok ajuruba ajanga iba lendong ya atalok ta bushitetba sülen 2023 küm Supreme Court-i taoba tir Maithripala Sirisena dang iba lendong nung timtem ajuru alir nem sen million aika compensation agütsütsü totuyuba agüja liasü.

Iba lendong ataloktsüsa "criminal negligence" mechi taoba mapang ketdangsür inyaka alir ana nem tasüba agi merenshitsü taoba ita obendang agüja liasü. Sri Lanka nung küm aika tejen 'moratorium on executions' aliba mechi tasüba agi merenshitsü ya arishi tepiyong tepuokdak ayutsü agi melentsür.

Sri Lanka nunger temi iba lendong asoshi ochi obendang khanga mapang shia longkak aita aru.



India External Affairs Minister S Jaishankar, abelen nungi anabuba; Poland Deputy Prime Minister and Foreign Minister Radek Sikorski, abelen; Hungary Deputy Prime Minister and Foreign Minister Anita Orban, achichi; Slovakia Foreign Minister Juraj Blunar, toyong, aser Czechia Foreign Minister Petr Macinka nungertem New York yimti nung 81buba United Nations General Assembly (UNGA 81) session amentsü lia tangokba noksa ka yangi angur.



ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110029
EXAMINATION SECTION



ADMISSION NOTICE NO. 148/2026

F.No.AIIMS/Exam.Sec./Advt./4-5/(INI-CET-PG-Jan-27)/202602.09.2026

January 2027 session atema PG Courses nung admission tema metetdaksür

AIIMS, New Delhi aser tanga AIIMS, JIPMER Puducerry, NIMHANS Bengaluru, PHIMER Chandigarh & SCTIMST Trivandrum nung PG courses [MD/MS/M.Ch.(6years)/ DM(6years)/ MDS] admission atema Institute of National Importance Combined Entrance Test (INI-CET) January 2027 session asoshi AIIMS, New Delhi ajanga tsünglanglen shia aliba ama online applications meshir.

Online Registration for application	Start date	Closing Date
Online Registration for application	16.09.2026	13.10.2026 (by 5:00 pm)
Status of Registration	17.10.2026	19.10.2026 (by 5:00 pm)
Uploading of admit card on AIIMS website	26 th October, 2026 (Monday)	
Date of Examination	01 st November, 2026 (Sunday)	

Updates tasen aser osang tejangja website www.alimsexams.ac.in nung angutsü.

ASSTT. CONTROLLER (EXAMS)

CBC : 17112/11/0042/2627

Mokokchung nung 19th Imchaba Nagaland Open Volleyball Trophy asayar



Mokokchung, Rongjui/ September 22 (TYO): 19 buba Imchaba Master Memorial Nagaland Open Volleyball Trophy 22nd Sept nü Multi-purpose Sports Complex, Mokokchung nung Mokokchung Municipal Council (MMC) Chairperson, Imkongchuba A-i meraketa tenzüksüogo.

Taküm iba asayamung nung Tuensang, Wokha, Kohima, Zunheboto aser Mokokchung district-tem nungi telok 14 Pool pezü küma lemsar asayadaki. Pool 'A' nung - Pangti Volleyball Team, Longsa Sporting Association, Bokato Memorial Team, Chienino Brothers Kiruphema; Pool 'B' nung - Changtongtongya Volleyball Association, Twin Brothers Chungtia, Unicorns Tuensang, Zenith Pughoboto; Pool 'C' nung - Phoenix Club, yaküm champion Evergreen Club Ungma, Savage Setters Volleyball Club Chungtia; aser Pool 'D' nung - Yangs Brother, Khangshang Volleyball Academy aser ajaki sabuba MH-10 Kohima lir.

Asayamung tenzüka mezüng asaya Pangti Volleyball Team o Longsa

Sporting Association na asayaba, Pangti teloki points 27/25 & 25/17 agi LSA madak takok ngua liasü.

Iba trophy shir teloki bendir, Champion nem ?1, 00,000/-, Runner-up nem ?70,000/-, tasembuba aser pezübuba nem ?30,000/- aser ?20,000/- senpettsütsü. Iba den külemi neja - Best Spiker, Best Setter, Player of the Tournament aser Emerging Player-tem shima senpettsütsü tayongertem terenemba lir.

Iba asayamung ya Mokokchung District Volleyball Association (MDVA)-i state nung volleyball asaya ajungkettsü aser lanurtem ajungshitsü nükla yur kümshi ayongzüka akar. Iba asayamung ya 2003 nungi asayar aser ibai mezüngbo Mokokchung district sasep atema dang ayongzüük, saka tensa den sütepa süki ulushia tangbo state level kümer asaya-a arur.

Mezüngbuba nungi 18 buba tashi (1st - 18th Edition) Imchaba Master Memorial Nagaland Open Volleyball Trophy champion abenertem yamai lir - 2003: Dilong Ward, 2005: Longsa Team, 2007: Longsa Sporting Association,

2009: Longsa Sports Association, 2010: Longsa Sports Association, 2011: Longsa Sporting Association A, 2012: Lenzung Club Changtongya, 2013: Sporting Club Mangkolemba, 2014: Sporting Club Mangkolemba, 2015: Adventure Club Changtongya, 2016: Lakhuni Sporting Club B, 2017: Sakutemjen Memorial Club Chungtiayimsen, 2018: Sakutemjen Memorial Club Chungtiayimsen, 2019: Changtongya Volleyball Association, 2022: MH - 10 Kohima, 2023: Ozumi Volleyball Team, 2024: MH - 10 Kohima, 2025: Evergreen Club Ungma. Taküma shir teloki abentsüar Final (25th September) nü jangjatsü.

Tongti tesemdanger Imkongchuba-i asayartem dang meranga aser yimya tajungtiba nung nükjidong yur külem tetoktepertem akümtsümbua asayaba den ajemalua takok angutsü aser tamakokjia nümatanga agizüksü asoshi ayongzüük. Asayamung marok jagi shir teloki takok angu ta ashitsü akok, saka asen yimyaliru jagi koma asaya ta kuli sayur, ta paisa shisem.



DGP, Nagaland (Retd) aser State Election Commissioner, Nagaland T John Longkumer-i Manali, Himachal Pradesh nung September 27 nü nungi agitsü aliba 6buba rally of Himalayas nung shilem agitsü asoshi NAMS rallyists tem apusoa yokba noksa nung angur. Along Aier aser Vikishe Shohe na taruba rally nung Nagaland aser NAMS tenüng nungi shilem agitsü. Tena yagi 2001 küm Raid de Himalayas nung 4x4 extreme category championship trophy bena otsü tasen yanglua liasü.

National Games atema NWA-i 2buba selection trial ayongzüka agiogo

Kohima, Rongjui/ September 22 (TYO): Nagaland Olympic Association (NOA) aser Department of Youth Resources & Sports, Government of Nagaland na den longjemer Nagaland Wrestling Association (NWA)-i ayongzüka 2027 küm 39buba National Games atema tanabuba selection trial ayongzüka agiogo.

Selection trail ya Freestyle, Greco-Roman aser tetsür Wrestling atema Multi-Purpose Hall, Viswema nung Mongolbarnü agiogo.

NWA Joint Secretary, Kuzhovesa Soho-i sangdong ka ajanga ashiba agi, August 20 nü nungi tenzüka training camp ka agiba sülen selection trial ya agiogo, koba Meghalaya nung National Games atema wrestler tem renema toktsütsü nükjidong nung ayongzüka agiogo. National Games nung Nagaland ya wrestling asaya indang co-host asütsü.

Nagaland tenüng nung iba asayamung nung asayadaksütsü atema

asayartem jangja arangtetshitsütsü asoshi iba camp aser trail agiogo, aser iba ajanga wrestling asaya ajungkettsü atema NWA, NOA aser Department of Youth Resources & Sports bendanga agütsür aliba sayur.

Iba sentong nung Chakhesang Wrestling Association (CWA) tir Vezohu Ruho alakteta jaoker liasü. Pai wrestler tem dang temaba jenjang atongtsü merangba mapang yimayimpong azioka alitsü, aremzüksü aser Tsüngrem akümtsübuttsü ajungshiba den, bendanga agüja minyakra takok mongutettsü ta ashi.

Ajak senteper Angami, Chakhesang, Zeliang, Chang, Sumi, Pochury, Sangtam aser Rengma kin nungi asayar 45-i trails nung shilem agiogo. Asayar shimshiba inyakyim ya NWA Coopted Technical Secretary, Kikhwesül Thokhwe, Suryansh Sehwat (Coach) aser Thechamo Murry (Assistant Coach) nungeri ketdangsüa liasü.

State Level U-14 Sepaktakraw C'ship tenzüko

Kohima, Rongjui/ September 22 (TYO): Nagaland MLA aser Advisor for SCERT and Food Processing Achumbemo Kikon-i Mongolbarnü Sepaktakraw asaya yagi Naga nung lanurtem nem international jenjang nung asayatsü atema lenmang lapoktsütsü akok ta shia parnok dang iba maongka agitsü ayongzüka liasü.

Indira Gandhi Stadium Kohima nung tetsür aser tebur State Level 'Catch Them Young' U-14 Sepaktakraw Championship lapokba sentong nung o jembiba mapang Kikon-i, international jenjang nung toktepba medal angutsü asoshi Naga nung asayartem dak sempet lir, ta ashi.

Pai, Naga nung asayartem international jenjang nung toktepba ya asaya ajanga maongka agütsüba tatishitsü ka lir ta shia asayartem dang temaba jenjang nung tokteptsü atema nükjidong ayutsü ayongzüük.

Naga nung asayar asem India tenüng nungi tang Asian Games nung asaydar. Asayartem ya Sepaktakraw nung Seyiekhrieno Tapa aser

Menenu Tsukru na aser Para-Asian Games nung shot-put asaya nung Hokato Hotozhe Sema ta alitsü.

Ajisüka Kikon-i, asaya nung takok angutsü atema pei meit azüoktsü aser yimayimpong tajung beshitsüji kanga tongtibang lir ta ashi.

Maneni pai lanur asayartem dang saisabong ya profession ka ama agitsü ajungshiba den, iba ajanga shitemang anema toktsüba dang masü saka career ka ama agitsü aser tetoktepba balala ajanga sen aazüksü asoshi maongka agütsür, ta ashi.

Sentong nungsa All Nagaland Private Schools' Association (ANPSA) Central, senior Advisor, Pheluopfeli Kesiezie-i lokti ajungshia liasü.

Sentong nung YRS Joint Director, Khriehutu Tsira-i ketdangsüa tetsür team 12 aser tebur team 15 ta team 27 tenangzüktepba agia liasü.

Anogo ana asayatsü aliba asayamung ya All Nagaland Private Schools Association (ANPSA) den longjemer Department of Youth Resources and Sports-i ayongzüka asaydar.

BILEMDANGANG

"Tamakok anguba maparen aika takok anguba dang nungibo tajungba lir"